



Inuussutissarsiutigalugu aalisartut piniartullu pisortanit ikiorserneqarnissamik inatsisitigut periarfissaat aammalu kommunemi allaffissorinikkut kingunerisassai pillugit Naalakkersuisut nassuiaanissamik peqquneqarnissaannik Inatsisartut alajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

(Siullermeerneqarnera)

Qujanaq Inatsisartunut ilaasortaq Doris Jakobsen Jensen siunnersuummut.

Uagutaaq Demokraatini ajornartorsiut ilisimaaraarput.

Suliniuteqarnikkut Naalakkersuisut qanittumi toqussutigisinnaasaminnik napparsimasut pitsaanerumik tapersorneqarnissaat qulakkeerniarlugu nalunaarummik sanallutillu saqqummersitsipput. Nalunaarusiami napparsimasut qanigisaasullumi apersorneqarsimapput. Inuit atukkaminnik oqaluttuaat assorsuaq attorneqatigaakka. Ersarippoq, napparsimasut qanigisaasullu ilungersunartumi anigorneqarsinnaanngitsumilu inissisimasut, tassungalu isumaqarpunga, uagut inuiaqatigiittut ullumikkuminngarnik piareersimanerusariaqartugut pitsaanerumik ikiuuteqarnissatsinnut.

Demokraatini kissaatigigaluarparput, pisariinninngorlunilu paasinarningussasoq. Arlaatigut innuttaasut aningaasaqarnikkut ikiorseriaannaasariaqarigut imaasillugu, napparsimanerminni aningaasaqarnerat aggerfiminni aningaasaqarnerannut tulluussarlugu. Tamanna isuma soorunami aamma atuuppoq aalisartutsinnut piniartortatsinnullu suleruluttunut. Imaassinnaanngilaq, aaqqissuussaanerput ima ippat, taakku inuit pitsassuit piniakkaminnut pisinnaatitsissutitik (licens) taamaatiinnartariaqartassappatigit suliffissaaleqisutullu nalunaarlutik pisortanit ikiorsiissutinik aatsaat taamaaliornermikkut pisinnaagamik. Tamanna pinngitsoorata pitsanngorsartariaqarparput.

Demokraatinit Naalakkersuisut kommunillu sakkorsuumik kajumissaarusuppagut allaffissornerujussuakkut pipallataq taanna aaqqqequllugu inuillu napparsimasut ataqqinninnermik nikassaanngitsumillu iliuuseqarfigilerlugit.

Taamaattumik nalunaarusiornissamik siunnersuut taperserparput, peqataaffiginiangilarpulli, Naalakkersuisut kinguarsaatitut atussappassuk. Tassunga ajornartorsiummut iliuuseqartoqartariaqarpoq piaarnerpaamik.

Taamatut oqaaseqaateqarluta siunnersuutip aappassaaneerneqannginnermini ataatsimiitaliami susassaartumi suliareqqinneqarnissaa innersuussutigaarput.